

## Il cussegl dals chantuns refusa da prolungar il servetsch civil

■ (sda/anr) Il servetsch civil na vegn betg prolungà. Il cussegl dals chantuns ha refusà ier ina moziun che leva augmentar la durada dal factor 1,5 sin il factor 1,8 en cumparegliaziun cun il servetsch militar. La moziun aveva *Corina Eichenberger* (pld/AG) gia inoltrà il settember 2009. Pauc mais avant avevan ins abolì l'examen da cunscienza ed adina dapli umens vulevan prestar servetsch civil. Il cussegl naziunal ha ditg gea a l'intervenziun il 2011.

Il cussegl dals chantuns ha suenter decidì d'emprim spetgar sin il rapport davart il servetsch civil avant che decider. En il fratemp è il rapport sin maisa e mussa: Il 2009 e 2010 ha i dà in tschuat dapli admissiuns, suenter èn ellas dentant puspè idas enavos.

Ils quitads da la moziunaria, che l'armada na survegnia betg avunda schuldada, na sajan pia betg sa verifitgads, ha ditg il president da la cumissiun *Alex Kuprecht* (pps/SZ).

E *Claude Hêche* ha fatg attent che da-

pli glied na prestass insumma nagin servetsch pli sch'ins prolungass il servetsch civil.

L'avrigl 2009 avevan ins abolì l'examen da cunscienza. Dapi lura vala il fatg ch'ils civis èn pronts da prestar in servetsch pli lung sco mussament per in conflict da cunscienza.

Suenter la midada è il dumber da dumondas da prestar servetsch civil creschì. Ils emprims dudesch mais eri 8500 dumondas entant ch'igl era uschiglio be 2000 dumondas l'onn.